

42. Noctes frigidæ, omnigenæ voluptati convenientes, in intimis ædibus, vento haud obnoxiiis, lucernis immotis, quasi oculis suis, illius testes evadebant.

43. Conspicientes Mangiferæ flores atque ramos, Noto allatos, mulieres, rixarum oblitæ, eum, cujus separationem haud ferebant, mitigare studebant.

44. Illas gremio exceptas agitans in oscillo a servis jactato, vehementem amplexum nanciscebatur brachiis illarum, quæ timorem fingentes funem dimittebant.

45. Oblectabant eum amatae unguento mammis illito, ornatu pulchro, margaritis distincto, vestibus æstati convenientibus, gemmarumque cingulis, ad femora usque dependentibus.

46. Eo quod ille vinum potabat, contritis Mangiferæ surculis rubrisque *pátalæ* floribus mixtum, illius amor, vere transacto debilis, novus reddebatur.

47. Ita sensuum voluptatibus fruens, ceteraque negotia negligens, rex amore actus transegit anni tempora, suis indiciis distincta.

48. Eum, quamquam ita inebriatum, propter potentiam ejus alii reges superare haud valebant; sed veluti DAKSHÆ imprecatio lunam, sic illum conficiebat morbus, e voluptatibus perceptis ortus.

49. Ille, medicis haud obediens, non reliquit voluptates, etsi earum perniciem perspiciebat: nam sensus, rebus dulcibus abrepti, ægre inde avertuntur.

50. Tabe exhaustus, pallido vultu, pauca ornamenta gerens, aliis innixus incedens, submissa voce loquens, similis erat viro amanti.

51. Cum rex ita tabe consumeretur, ejus stirps similis erat cœlo, quando luna ad ultimam partem usque decrevit, seu lacui æstivo, in quo nil nisi lutum superest, seu lucernæ, parva flamma lucenti.

52. "Hisce diebus profecto rex sacrificium instituet pro filio obtinendo!" Ita ministri, morbum regis occultantes, continuo dicebant civibus, culpam aliquam commissam esse timentibus.

53. At ille, quamquam multarum feminarum socius, antequam progeniem expiantem conspiceret, ut lucerna ventum, sic hunc morbum, medicorum labores irritos facientem, haud superavit.